

1. UVOD

Otvaranje tržišta i ekonomska saradnja zemalja bitna su pretpostavka rasta BDP-a i zaposlenosti. Rast izaziva sektorske i regionalne neravnoteže za koje se moraju nalaziti rješenja intervencijama globalnih institucija i regionalnih integracija. Reforme globalnih institucija i regionalnih integracija u svrhu ispravljanja neravnoteže koje stvara tržišna nesavršenost prihvatljivije je od stvaranja parcijalnih obrambenih mehanizama i sprečavanja mobilnosti roba, usluga, kapitala, pa i ljudi. Amortizacija kratkoročnih tekućih udara rješenjima primjerenim razvoju sa posebnim naglaskom na brži rast slabije razvijenih zemalja uspostavlja se i interakcija između ponude kreirane na inovacijama i potražnje izazvane rastom slabije razvijenih tržišta. Argumente za to nalazimo i u Evropskoj uniji u kojoj konstantno postoji sukob između tradicionalnih ekonomskih strukturnih dijelova, socijalnih grupa i dovršenih procesa sa nacionalnim i sličnim karakteristikama i izražene potrebe stvaranja novih vrijednosti koje nameće savremeni razvoj.

Evropska unija nije država već jedinstveno partnerstvo evropskih zemalja, koje nazivamo zemljama članicama. Zajedno, one obuhvataju veliki dio evropskog kontinenta. EU je dom oko 510 miliona ljudi, koji čine oko 6% svjetske populacije. Građani zemalja članica Evropske unije istovremeno su građani Evropske unije.

Evropska unija kao nacionalna tvorevina stvorena je sa željom da se u što većoj mjeri privredno i ekonomski razviju zapadnoevropske zemlje, naročito nakon razarajućeg Drugog svjetskog rata. EU od samog svog nastanka imala je želju da se što više razvija i širi. Prvi razlozi bili su prije svega ekonomski, sa željom da se omogući sloboda kretanja robe, ljudi i kapitala, a drugi razlog je uglavnom bio političke prirode.

Evropska unija insistira na uvođenju nekih vrijednosti koje nisu čisto ekonomske prirode, ali koje, implementirane u trgovinsku politiku, vode ka ekonomskom napretku svih zemalja. Najkraće rečeno, insistira na održivom razvoju pod kojim se podrazumijeva ravnoteža u ekonomskom razvoju na globalnom nivou, u jednom utvrđenom pravnom okviru koji nudi predvidljivost, stabilnost i transparentnost, uz poštovanje zaštite životne sredine, zaštite potrošača i njihovog zdravlja i bezbjednosti.

Evropa se dugi niz godina borila da stvori jedno veliko i zajedničko tržište, koje nije nastalo na osnovu ratova i kolonijalnih osvajanja, već koje je rezultat zajedničkog interesa država u Evropi. Razvojem EU dolazi postepeno do razvoja zona slobodne trgovine, poreskih politika, a kasnije i do carinske unije.

1.1. Predmet i značaj istraživanja

Predmet istraživanja ovog diplomskog rada se posmatra kroz teorijski koncept poreza i carina u Evropskoj uniji.